

RADUNANZA CUMÜNELA

100. Protocol dals 16-02-2022 - 20.15 h

Il president cumünel, sar Andrea Gilli, po salüder 40 personas cun dret da vuscher, v.d. 5.9% dal totel da las votantas e dals votants, a la radunanza cumünela illa sela da gimnastica da la scoula primara Zuoz.

In sieus plets d'introducziun declera il president cumünel cha la radunanza cumünela vain la prüma vouta transmissa per „live stream“ e po gnir persegueda da chesa davent. Üna seguonda novited allegraivla es il fat cha la granda part da las imsüras cunter Covid-19 vegnan schlubgedas a partir dals 17 favrer 2022.

Scu scrutinaduors vegnan numnos e tschernieus per la vart vers Arpiglia sar Roman Grossrieder e sar Gian Rico Blumenthal per la vart vers Albanas e la maisa dal cussagl. Il president gratulescha per la tscherna onurifica.

589 01 Organisaziun da vschinauncha
 01.C Radunanza cumünela
 01.D.01 Approvaziun protocol

1. Protocol da la radunanza cumünela dals 24 november 2021

In sieus plets d'introducziun per quista tractanda declera il president cumünel cha'l protocol da la radunanza cumünela dals 24 november 2021 es sto publicho vi da la tevla naira e sülla pagina d'internet da la vschinauncha dals 9 december 2021 fin ils 9 schner 2022. Ils votants e las votantas haun temp 30 dis düraunt il temp da publicaziun per inoltrer eventuels recuors cunter il protocol. Siand cha que nu d'eira il cas vela il protocol automaticamaing scu accepto. Il president ingrazcha al chanzlist per la cumpilaziun.

590 01 Organisaziun da vschinauncha
 02.H Votaziuns ed elecziuns
 02.H.02 Tschernas da Chalandamarz

2. Propostas per las tschernas da Chalandamarz 2022

Il president declera cha culla missiva saja gnieu comunicho per che caricar chi's stu fer tschernas da conferma resp. da rimplazzamaint. El spiega cuort ils artichels 18, 19 e 20 da la constituziun cumünela, chi defineschan l'execuziun da las tschernas cumünelas.

Cussagl cumünel: Duonna Ladina Tarnuzzer sto a disposiziun per ün'ulteriura perioda d'uffizi. Sar Romeo Cusini ho inoltro la demischiun, dimena stu gnir tschernida üna nouva commembra u tschernieu ün nouv commember. Our dal ravuogl da las votantas e votants vegnan propost sar Martin Camichel e sar Cristian Ferrari scu candidats pel cussagl cumünel.

Cumischiun sindicatoria: Sar Gian-Reto Rainalter ho inoltrato la demischiun da la cumischiun sindicatoria, dimena stu gnir tschernida üna nouva commembra u tschernieu ün nouv commember. Our dal ravuogl da las votantas e votants vain propost sar Niculin Arquint scu candidat per la cumischiun sindicatoria.

Cumischiun da fabrica: Sar Marco Salzmänn sto a disposiziun per ün'ulteriura perioda d'ufizi. OTRAS propostas nu vegnan fattas.

Cussagl da scoula: Sar Roman Grossrieder ho inoltrato la demischiun, dimena stu gnir tschernida üna nouva commembra u tschernieu ün nouv commember. Our dal ravuogl da las votantas e votants vain propost duonna Karin Casty pel cussagl da scoula.

Il president renda attent cha ulteriuras propostas paun gnir inoltradas in scrit fin in venderdi, ils 18 favrer 2022 a las 17:00 süll'administraziun cumünela.

591 01 Organisaziun da vschinauncha
01.C Radunanza cumünela
07.I Chesa da fliamaint Promulins

3. Promulins – la nouva chesa da fliamaint

Sar cusglier Christian Florin preschainta a maun d'üna preschantaziun da „PowerPoint“ la situaziun da la chesa da fliamaint Promulins a Samedan. El preschainta la situaziun actuela culs edificis existents, ün fabrico dal 1979 ed ün dal 1992. La decisiun regiunela d'eira da renover e saner l'edifizi da l'anneda 1992 e dad uzer l'edifizi per duos plauns. La chesa fabricada l'an 1979 locunter, dess gnir sbudeda e fabricada nouv. Ils cuosts previs per tuot quistas lavuors sun CHF 48.0 milliuns, la part per la vschinauncha da Zuoz importa CHF 5.0 milliuns. Sar Christian Florin po infurmer cha al mumaint es la fabrica bain aint il ram dals cuosts previs. La sanaziun e l'uzer l'edifizi dal 1992 d'eira üna lezcha difficila, ma ho funcziun fich bain. Cun ün pêr fotografias illustrescha sar Christian Florin las lavuors realisesas aint illa part da l'an 1992. Ils sulers clers, las chambras ed ils bagnos renovos illa grandezza dumandada hozindi, las stanzas publicas per visitas e las cuschinas faun üna fich bella impreschiun. La cuntinuaziun da la fabrica es la sbudeda da l'edifizi dal 1979 ed il nouv fabricat per rimplizzer l'edifizi. Quistas lavuors sun previsas düraunt ils ans 2022 e 2023 cul l'avertüra la fin dal 2023. Siand cha nu vain dumando il pled per dumandas our dal ravuogl da la radunanza serra sar Christian Florin sia preschantaziun e do il pled al president cumünel. Il president agiundscha cha sper la fabrica da Promulins vain eir fabrico üna chesa da fliamaint a San Murezzan. Ün concept da gestiun, suot la bachetta da la fundaziun dal provedimaint da sandet Engiadin'Ota, es in elavuraziun per gestiuner las duos chesas da fliamaint a Samedan e San Murezzan. Il president ingrazcha a sar Christian Florin per las infurmaziuns preschantedas ed eir per la lavur prasteda a favur da la chesa da fliamaint a Promulins.

592 01 Organisaziun da vschinauncha
01.C Radunanza cumünela
01.C.05 Infurmaziuns

4. Orientaziuns

Sur elavuraziun constituziun cumünela: La sur elavuraziun fo dabsögn, es invieda ed il president sperescha da pudair preschanter üna proposta a la prosma radunanza cumünela.

Revisiun totela da la planisaziun da lö / ledscha da fabrica cumünela: Eir quista sur elavuraziun es invieda e vain accumpagneda dad üna gruppa da lavur. Il böt es da purter la revisiun totela da sted u d'utuon da quist an davaunt radunanza cumünela.

Sur elavuraziun ledscha taxas da giasts e turissem: Ün'otra gruppa da lavur as dedichescha a la sur elavuraziun da quista ledscha, chi stu gnir adatteda.

Sanaziun mür da sustegn veglia via Zuoz – Madulain: Il stedi dal mür da sustegn dumanda zieva imsüras chi sun per part già inviedas e vegnan executedas quista prümavaira/sted.

Sanaziun entreda da la vschinauncha West / Via Staziun: Quista vain realiseda quist an ed in connex vain eir alluntano la bos-cha da tuottas duos varts da la Via Staziun.

Planisaziun fabrica rundella per la cruscheda Resgia: la progettaziun da la rundella es in maun dal chantun, chi prevezza da fabricher la rundella dal 2024. In connex cun quista fabrica es eir da sur ponderer la situaziun dal trafic plaun in tuot l'areal Resgia e Sur En.

Adattamaint cunvegna da prestaziun forestel/servezzan tecnic culla vschinauncha da S-chanf: Quistas lavuors sun quasi realisedas e vegnan alura preschantedas a la radunanza cumünela.

Sur elavuraziun Uorden da Chalandamarz 2023: La cumischiun da Chalandamarz es landervi da sur elavurer l'uorden ed il president sperescha dad avair üna discussiun frütta-ivla a la radunanza cumünela in avuost da quist an per deliberer ün nouv uorden chi vo in vigur per l'an 2023.

Elavuraziun analisa da potenziel areal Purtum/Plagnoula: Il cussagl cumünel spetta süls resultats da l'analisa da potenziel per pudair cuntinuer la discussiun scu cha'l futur dals areals Purtum e Plagnoula our da la vista da la scoula e dal turissem pudess guardar our.

Elavuraziun cunvegna da prestaziun futura culla ESTM AG: Quist es ün tema permanent, las discussiuns cuntinuan, ma il president cumünel es optimistic cha tuot ils partenaris dal turissem chattan la stüerta per cuntinuer quist proget turistic regiunel.

Gestiun da prouva via da glatsch Zuoz – Madulain – Zuoz: La gestiun da prouva da la via da glatsch as demuossa scu success, es üna spüerta da qualited e fich dumandada. Zieva l'inviern ho lö üna valütaziun sur da pussibels dans e cullas imsüras necessarias e meglioraziuns es l'ideja da cuntinuer culla spüerta.

Valütaziun nouv reschim da la rumida da naiv: Üna prüma valütaziun es fich positiva, la rumida da naiv es gnida pü efficaci e diversas uras paun gnir druedas pü bod per eir mantegner las sendas dad ir a spass. In connex culla rumida da naiv ho que eir do adattamaints tal deposit da naiv in Resgia sper l'En. Nouv stu la naiv gnir mantuneda e cula pür da prümavaira aint in l'En e na già uossa.

Evaluaaziun dal stedi da la Punt Maillart e la Via Dorta (part suot): Il cussagl cumünel ho stuvieu piglier cugnuschentscha, cha la Punt Maillart, ün oget dad architectura istoric, es in ün nosch stedi. Insembel culla valütaziun per imsüras as piglia er a maun la valütaziun da la Via Dorta, da la stalla Geer ingiò, per a cas realiser meglioraziuns.

Evaluaaziun sanaziun tet da la sela da gimnastica: La situaziun es uschè cha'l tet plat chaschuna ova chi cuorra e cula dal tschêlsur giò per las paraids internas. Siand cha'l tet es magari vegl gnaro be in dumanda üna sanaziun totela, scha pussibel già quist an.

